



Aqqalu C. Jerimiassen

UKA 2020/198

Atassut

13. oktober 2020

Uunga siunnersuut: Inatsisartunut qinersisarneq pillugu Inatsisartut inatsisaat nr. xx, xx. xxx 2020-imeersoq.

(Naalackersuisut Siulittaasuat)

Atassummiit nuannaarutigilluinnarparput Siverth K. Heilmannip Atassummiit inatsisissatut siunnersuusiariinikuusaa saqqummiunneqaqqimmat. Naak Siverthip K. Heilmannip siunnersuutigimmagu itigarteqqaariarlugu Naalackersuisut maanna namminneerlutik saqqummiukkaluaraat tamakkiisumik isumaqatigalugu nalunaariiginnarsinnaavugut.

Taannaavorlu partiit qinersinermi kingullermi Inatsisartuni ilaasortaatitaqareersimasut, qinigaaffiup ingerlanerani ilaasortaatitaarussimagaluarlutik qinersinissap tullissaani atsiortitseqqaaratik sassartitaqarsinnaalernissaat siunertaralugu. Taamaalillunilu partiinut mikinerusunut artukkiisinnaaneq atorunnaassalluni.

Digitaliusumik qarasaasiaq atorlugu allakkatigut qinersisoqarsinnaalernissaanut inatsisip periarfissiisinnaangornissaa pillugu Atassummiit taperseerusuppugut, tassami nunarput taamak isorartutigitillugu periarfissat atorluartariaqarpagut, tamat oqartussaaqataanerat atorluarumallugu. Inuillu pissutsit assigiinngitsut pissutigalugit qinersinissaminnut periarfissaalatsisut qinirseqataanissaannut periarfissagissaarnerulernissaat taperseerparput.

Systemillu atorneqartussap tatiginarluinnartumik atugassiarineqarsinnaanera qulakkeerneqarsinnaappat ajornartussaqaartinngilarput. Allaallu piffissanngoriartuaarsinnaalersinnaalluni toqqaannarnerusumik tamat oqartussaaqataanerat atuutsikkiartuaartissinnaalariartussallugu. Tassalu politikikkut aalajangiiffissani qitiunerusutut (principielle) inissisimasut innuttaasut toqqaannarnerusumik taaseqataaffigilersinnaassagamikkit.

Pingaaruteqarportaaq digitaliusumik qinersisarnikkut aaqqissuussinermi qulakkiissallugu qinersisoqarnerani ilinniartut ilinniarnarup nalaani angerlarallaqqasut, feriarlutilluunniit qinersinissaminnut periarfissaqartitaanissaat.

Qinersisarneq eqqartortillugu Atassummiit eqqaanngitsoorusunngilarput, tamat oqartussaaqataanerat tassaannaanginnami ukiut sisamakkaarlugit qinersineq. Isumaqaanngisaannassaarmi qinigaareernerup kingorna tassa qanorsuaq qinikkat iliorsinnaalissasut, inatsisinillu avaqqutaarillattaaginnarsinnaalissasut. Tamannami inatsisiliortuunerup isumaanut paarlaanneqaanngisaannassaaq. Qinikkat akisussaaffeqarpugut aamma qinigaaffik tamakkerlugu

innuttaasut tusarnaartuassallugit, demokratiillu sutigut tamatigut innarlerneqannginnissaa suliarluarlugu.

Taamatut naggaserallarlugu Atassummiit inatsisissatut siunnersuut Inatsisinut ataatsimiititaliamut innersuupparput.